

樂府詩集

樂府詩集卷第八十六

太原

郭茂倩

編次

新歌謠辭

歌辭

中興歌十首

鮑照

千冬逢一春萬夜視朝日生年值中興歡起百年畢
中興太平運化清四海樂祥景照玉臺紫烟遊鳳閣
碧樓含夜月紫殿爭朝光彩輝散蘭麝風起自生芳
白日照前窗玲瓏綺羅中美人掩輕扇含思歌春風
三五容色滿四五妙華歇已輸春日歡分隨秋光沒
北出湖邊戲前還苑中遊飛縠繞長松馳管逐波流

九月秋水清三月春花滋千金逐良日皆競中興時
窮泰已有分壽夭復屬天旣見中興樂莫持憂自煎
襄陽是小地壽陽非帝城今日中興樂遙治在上京
梅花一時豔竹葉千年色願君松柏心採照無窮極

勞歌二首

伍緝之

莊子曰勞我以生佚我以老息我以死韓
詩曰飢者歌食勞者歌事若伍緝之云述
邇已窮極又云居身苦且危則勞生可知
矣

幼童輕歲月謂言可久長一朝見零悴歎息向秋霜述
邇已窮極疾病復不康每恐先朝露不見白日光庶及

盛年時暫遂情所望吉辰旣乖越來期眇未央促促歲月盡窮年空怨

悲一作傷

女蘿依附松終已冠高枝浮萍生託水至死不枯萎傷哉抱關士獨無松與期月色似冬草居身苦且危幽生重泉下窮年冰與漸多謝負郭生無所事六奇勞爲社下宰時無魏無知

同前

蕭 摛

百年能幾許公事罷平生寄言任立政誰憐李少卿

白日歌

張 融

張融歌序曰懸象著明莫大於日月而彼日月不能不謝固知無準衰爲盛之終盛

乃衰之始故爲白日歌

白日白日舒天照暉數窮則盡盛滿而衰

雲歌

王臺卿

玉雲初度色金風送影來全生疑魄暗半去月時開欲知無處所一爲上陽臺

一旦歌

一旦被頭痛避頭還著牀自無親伴侶誰當給水漿匍匐入山院正逢虎與狼對虎低頭啼垂淚淚千行

滎豫歌二首

鄴道元水經注曰白帝山城水門之西江中有孤石名滎豫石水冬出二十餘丈夏

則沒亦有裁出焉江水東逕廣峽溪乃三峽首之也峽中有瞿塘黃龕二灘夏水回復汧所忌十道志曰滎豫石與城郭門外石潛通蜀人往燒火伏石則滎預邊沸國史補曰蜀之三峽最號峻急四月五月尤險故行者歌之滎或作濫預或作豫

濫預大如馬瞿塘不可下

濫預大如牛瞿塘不可流

同前

梁簡文帝

滎預大如服瞿塘不可觸金沙浮轉多桂浦忌經過

巴東三峽歌二首

酈道元水經注曰巴東三峽謂廣溪峽巫
峽西陵峽也三峽七百里中兩岸連山路
無闕處重巖疊嶂隱蔽天日非亭午夜分
不見日月其中有灘名曰黃牛江湍紆回
信宿猶見故行者謠曰朝發黃牛暮宿黃
牛三日三暮黃牛如故宜都山川記曰自
黃牛灘東入西陵界至峽口一百許里山
水紆曲林木高茂猿鳴至清山谷傳響泠
泠不絕行者聞之莫不懷土故漁者歌云

巴東三峽巫峽長猿鳴三聲淚沾裳

巴東三峽猿鳴悲猿鳴三聲淚沾衣

挾琴歌

范靜妻沈氏

逶迤起塵唱宛轉遶梁聲調弦可以進蛾睂畫未成

挾瑟歌

魏收

春風宛轉入曲房兼送小苑百花香白馬金鞍去未返
紅妝玉筯下成行

同前

陸龜蒙

挾瑟爲君撫君嫌聲太古寥寥倚浪絲
嚶嚶沈湘語賴有秋風知清冷吹玉柱

鄱陽歌二首

南史曰梁陸襄爲鄱陽內史大同初郡人
鮮于琮結司徒殺廣晉令王筠有衆萬餘

人將出攻郡襄先已率人吏脩城隍爲備
及賊至破之生獲琮時鄰郡守宰案其黨
與皆不得實或有善人盡室罹禍唯襄郡
枉直無濫民乃作歌又有彭李二家因忿
爭相誣告襄引入內室不加責誚但和言
解喻之二人感恩深自悔咎乃爲設酒食
令其盡歡酒罷同載而還因相親厚民因
歌之

鮮于抄後善惡分人無橫死賴陸君

陸君政無怨家鬪旣罷讎焚車

北軍歌

南史曰梁臨川靜惠王宏爲揚州刺史天監中武帝詔都督諸軍侵魏宏以帝之介弟所領皆器甲精新軍容甚盛北人以爲百數十年所未之有軍次洛口前軍尅梁城諸將欲乘勝深入宏聞魏援近畏懦不敢進召諸將欲議旋師呂僧珍曰知難而退不亦善乎停軍不進魏人知其不武遺以巾幘北軍乃歌之歌云韋武謂韋叡也不畏蕭娘與呂姥但畏合肥有韋武

雍州歌

南史曰梁南平王偉子恪爲雍州刺史年

少未閑庶務委之羣下百姓每通一辭數處輸錢方得聞徹賓客有江仲舉蔡遠王臺卿庾仲容四人俱被接遇竝有蓄積民間歌之後達武帝帝因接末句云

江千萬蔡五百王新車庾大宅主人憤憤不知客

始興王歌

南史曰梁始興忠武王憺爲都督荊州刺史時天監初軍旅之後公私匱乏憺厲精爲政廣闢屯田減省力役俟其窮困辭訟者皆立待符教決於俄頃曹無畱事下無滯獄後徵還朝而民歌之荆土方言謂父

爲爹故歌云人之爹也

始興王人之爹赴人急如水火何時復來哺乳我

夏侯歌

梁書曰夏侯夔爲豫州刺史於蒼陵立堰
溉田千餘頃境內賴之夔兄亶先居此任
兄弟竝有恩惠百姓歌之夔在州七年遠
近多親附

我之有州賴彼夏侯前兄後弟布政優優

咸陽王歌

北史曰後魏咸陽王禧謀逆伏誅後宮人
爲之歌其歌遂流於江表

可憐咸陽王奈何作事悞金牀玉几不能眠夜起踏霜
露洛水湛湛彌岸長行人那得度

鄭公歌

北史曰後魏鄭述祖爲兗州刺史有人入
市盜布其父執之以歸述祖述祖特原之
自是境內無盜先是述祖之父道昭亦嘗
爲兗州刺史故百姓歌之

大鄭公小鄭公相去五十載風教尙猶同

裴公歌

北史曰裴俠爲河北郡守躬履儉素愛民
如子郡舊有漁獵夫三十人以供郡守俠

曰以口腹役人吾所不爲也悉罷之又有
丁三十人僕郡守役俠亦罷之不以入私
竝收庸爲市官馬歲時旣積馬遂成羣去
職之日一無所取民歌之云
肥鮮不食丁庸不取裴公貞惠爲世規矩

長白山歌

北史曰來整榮國公護之子也尤驍勇善
撫御討擊羣賊所向皆捷諸賊歌之

長白山頭百戰場十五五把長槍不畏官軍千萬衆
只怕榮公第六郎

敕勒歌

樂府廣題曰北齊神武攻周玉壁士卒死者十四五神武恚憤疾發周王下令曰高歡鼠子親犯玉壁劒弩一發元凶自斃神武聞之勉坐以安士衆悉引諸貴使斛律金唱敕勒神武自和之其歌本鮮卑語易爲齊言故其句長短不齊

敕勒川陰山下天似穹廬籠蓋四野天蒼蒼野茫茫風吹草低見牛羊

同前

溫庭筠

敕勒金隤壁陰山無歲華帳外風飄雪營前月照沙羌兒吹玉管胡姬踏錦花却笑江南客梅落不歸家

東征歌

王通

杜淹文中子世家曰隋仁壽中文中子西
遊長安見文帝奏太平十有二策帝下其
議於公卿公卿不悅文中子知謀之不用
作東征之歌而歸帝聞而再徵之不至
我思國家兮遠遊京畿忽逢帝王兮降禮布衣遂懷古
人之心兮將興太平之基時異事變兮志乖願違吁嗟
道之不行兮垂翅東歸皇之不斷兮將身西飛

辟將軍歌

唐書曰高宗時辟仁貴領兵擊九姓突厥
於天山時九姓有衆十餘萬令驍健數十

人逆來挑戰仁貴發三矢射殺三人自餘
一時下馬請降仁貴恐爲後患竝坑殺之
九姓自此衰弱不復更爲邊患於是軍中
歌之

將軍三箭定天山戰士長歌入漢關

顏有道歌

唐書曰顏遊秦師古叔父武德初爲廉州
刺史時劉黑闥初平人多以彊暴寡禮風
俗未安遊秦撫恤境內敬讓大行邑里歌
之高祖璽書勉勞焉

廉州顏有道姓行同莊老愛人如赤子不殺非時草